



Jumat, 11 Maret 2022
Ogen: Masmur 25:6



"Perkuah Ate Si Tetap"



Pernah nge kote kinitekenta erkiteken perbeben si la teraloken? La lit manusia si la erperbeben i babo doni enda. Kerina manusia ngenanami ate mesui, ate nembah, ate cian, ate ngena, ate keleng ras sidebanna. E me nanam kegeluhen man banta si tading bas doni enda. Renungen wari enda mabai kita nggejapken perkuah ate Dibata ras keleng ate Dibata si nai-nai nari nggo reh man kalak si nggo nandai ras ngaloken IA jadi Juruselamat. I bas demna perbeben geluh, lanai si sedari kerna perkuah ras keleng ateNa e bas dirinta. Nggo belinen sigejapken perbeben e ngkuasai pusuhta asangkan perkuah ras keleng ate Dibata. Situhuna, Perkuah ate ras Keleng ateNa e belinen nge asa perbebenta. Perlu kal e si penanam-nanam, seh maka, i bas ngalaken perbeben e kita megegeh dinggen paguh. Enda me salah sada dahin Perkuah ateNa e reh man banta. Labo sia-sia dahin kalak si ngendesken perbebenNa e man Dibata, nggo pasti lit ulihna. E maka, rugi kal adi kita ndekah ngadi bas perbeben e.

Perkuah ateNa si tetap tading man kalak si ngelebu IA i bas katawari paksa pe. Dibata e ringan i bas geluhta, rembak ras kita, janah Dibata e la pernah tunduh, itatapNa kerina anak-anakNa janah labo gendeksa tanNa lako nampati. Passion 3 enda ngajuk kita gelah tetap ernalem man Dibata si dem perkuah ate e. Tuhu lit perbeben ndalani kegeluhen i bas mperjuangkan kinitekenta bage pe i bas ndalani kegeluhen. Jesus pe i bas ndalani kegeluhenNa, bujur ras erkeleng ate tapi e pe lit perbebenNa. Saja la gegehNa si sada ngalaken perbeben e, ibentasiNa kerina alu ernalem man Dibata. Em si jadi usihenta, la perlu aru. Perkuah ate Dibata e tetap ras lalap seh rasa lalap. Si urakilah ukurta gulut, alu ngedeskensa kerina perbebenta man Dibata. Lit nge serpang puluh, mari kita natap ras erlebu kempak Dibata tiap wari.